

Umqondisi wenkampani uyalelwe ukuba abuyisele abakwaSARS imali

Tshwane, 19 kuNcwaba 2021 – Umqondisi wenkampani olahlwe yicala lokungawathumeli amaphepha entelantengo libe ibhizinisi liqhubeka nokuhweba, uyalelwe iNkantolo yesiFunda yaseBloemfontein ukuba akhokhele uPhiko lweziMali eziNgenayo eNingizimu Afrika (SARS) imali engu-R400 853.

ULefa Tsaoane, ongumqondisi wenkampani ephekayo iphinde ihlinzeke ngamagumbi okulala ebizwa nge-Above Limits Trading CC ulahlwe amacala ayishumi (10) okukhwabanisa izolo (17 kuNcwaba) wabe esegwetshwa iminyaka emihlanu ebhadla ejele, kodwa kube yisigwebo esilengiswe iminyaka emi-5.

Kodwa-ke, emva kokuphenywa kwecala lobugebengu obekwenziwa uSARS, omunye umbandela wesigwebo sakhe esilengisiwe ukuthi umsolwa lo abuyisele abakwaSARS imali engu-R400 853, kuyo kumele akhokhe inani elingu-R 200 426 mhla noma ngaphambi komhla zingama-28 kuNhlolanja 2024 bese kuthi esalayo eyikhokha mhla noma ngaphambi komhla zingama-31 kuNcwaba 2026.

Umqondisi uphinde wagwetshwa kwenye inkantolo izinyanga eziyisithupha ebhadla ejele, zona ezilengiswe iminyaka emibili.

Inkampani yona igwetshwe ngokuhlawuliswa inhlawulo engu-R500 000, okuyisigwebo esilengiswe iminyaka emihlanu, kanti kwelinye icala ihlawulise inhlawulo ka-R10 000, elengiswe iminyaka emibili.

UKhomishana wakwaSARS u-Edward Kieswetter uthe isikhungo sisebenza ubusuku nemini sizama ukwenza kube lula kubakhokhintela ukuthobela imigomo yentela ngokuthi sihlinzeke ngengcaciso nesiqinisekiso ukuze bafeze izibophezelo zabo. Lapho abakhokhintela abangathobeli bezibandakanya nokukhwabanisa, isikhungo sizoqinisekisa ukuthi labo babhekana nengalo yomthetho. Lokhu kuzokwenza ukuthi ukungathobeli kwabo kube nzima futhi kumbe eqolo.

“Angeke simelana nokuphunzelwa yimali engenayo noma ingasiphi isikhathi, kodwa ikakhulukazi manje njengoba izwe lisazama ukutakula umnotho futhi libhekene nomthelela wobhubhane lwe-Covid-19.

“Le ndlela yokuziphatha ayamukelekile neze ikakhulu njengoba uhulumeni ezama ukwehlisa umthwalo emahlombe ezinkampani ezikhahlanyezwe izidubedube kanye nobhubhane,” kusho uMnu Kieswetter.